

RECENZIJA

publikacije "Stanje i kretanje kriminaliteta u Bosni i Hercegovini za punoljetne osobe u periodu od 2003. do 2012. godine"

Materijal pred nama je rezultat istraživanja grupe istraživača sa pravnih fakulteta u BiH o dinamici i strukturi kriminaliteta u BiH, u vremenu nakon izvršene opsežne reforme krivičnog procesnog i materijalnog zakonodavstva, te zavrjeđuje pažnju opšte, a naročito stručne javnosti i organa u čiji djelokrug rada spada bavljenje ovom problematikom. Poseban respekt istraživačkom timu treba odati za odlučnost da se, u uslovima nedovoljno uređenog stanja u pogledu vođenja statističkih podataka o stanju i kretanju kriminaliteta, upusti u ovaj poduhvat, te svakako za uloženi radni angažman koji je rezultirao ovom značajnom publikacijom.

Imajući u vidu razvoj kriminalne politike i u okviru nje mjera na suzbijanju kriminaliteta, značaj ovog rada se prvenstveno ogleda u tome što donosi mnoštvo važnih i interesantnih podataka i informacija o posmatranoj pojavi. To potvrđuju i sastavni dijelovi rada, kojima autori sugeriju pitanja koja su u fokusu ovog istraživanja. Vidljivo je da su struktura tih pitanja i domet njihovog proučavanja zavisili u značajnoj mjeri i od izvora statističkih podataka, s obzirom da u BiH ne postoji ujednačene baze podataka o stanju i kretanju kriminaliteta.

Iz kataloga oblasti koje su predmet istraživanja i analize očigledna je namjera autora da se na jednom mjestu prikažu sva bitna pitanja dinamike i strukture kriminaliteta, njegove perspektive i karakteristike. Riječ je o statističkim podacima i njihovo stručnoj analizi, o prijavljenim krivičnim djelima po poznatim i nepoznatim izvršiocima, rasvijetljenosti i strukturi prijavljenih krivičnih djela, zatim statističkim podacima o prijavljenim osobama i strukturi kriminaliteta pred tužilaštva u BiH (posmatrano u cjelini i kroz organizacionu strukturu tužilaštava sa stvarnom nadležnošću na entitetskom nivou, nivou BiH i Brčko distrikta BiH), te podacima o istragama, podignutim i potvrđenim optužnicama, optužnicama s kaznenim nalogom i optužnicama u postupcima pregovaranja o krivnji. U radu su takođe predstavljeni i podaci o sudskim odlukama, kako u prvostepenom postupku, tako i u postupku pred drugostepenim sudom. Istraživački dio završava se opširnjim izlaganjem i predstavljanjem podataka o stanju u pogledu izricanja kazni i drugih krivičnih sankcija. U konačnici ovaj rad je zaokružen sažetkom u obliku zaključnih napomena.

Istraživački autorski tim, koji čine nastavnici i saradnici pravnih fakulteta u BiH i to prof. dr. Hajrija Sijerčić-Čolić, Pravni fakultet Univerziteta u Sarajevu; mr. Nikola Findrik, viši asistent na Pravnom fakultetu Univerziteta u Bihaću; doc. dr. Vedad Gurda, Pravni fakultet Univerziteta u Tuzli; mr. Milijana Lepir, asistent na Pravnom fakultetu Univerziteta u Banjoj Luci; doc. dr. Dževad Mahmutović, Pravni fakultet Univerziteta u Tuzli; mr. Denis Pajić, viši asistent na Pravnom fakultetu Univerziteta "Džemal Bijedić" u Mostaru; doc. dr. Nezir Pivić, Pravni fakultet Univerziteta u Zenici; Ivana Stipanović, asistent na Pravnom fakultetu Sveučilišta u Mostaru; mr. Vildana Vranj, viši asistent na Pravnom fakultetu Univerziteta u Sarajevu, je očigledno bio suočen sa poteškoćama u prikupljanju statističkih podataka i njihovom ocjenom i o tome su iskazali svoje stavove kako u uvodnim i zaključnim izlaganjima, tako i u samom radu. Svoju pažnju su usmjerili na službene statističke podatke pribavljene od pravosudnih institucija, određenih agencija, zavoda i državnih organa, o čemu govore na odgovarajućem mjestu u radu.

S tim u vezi, autori podsjećaju stručnu javnost i nadležne institucije u BiH na potrebu intenziviranja saradnje u pogledu unaprjeđenja metodologije prikupljanja podataka o stanju i kretanju kriminaliteta, s aspekta ujednačavanja tih procedura i statističkih parametara radi jasnijeg pregleda stanja u ovoj oblasti i potpunije analize, a sve u cilju preduzimanja efikasnijih mjera na suzbijanju kriminaliteta i procesuiranju izvršilaca kriminalnih djela. Zbog navedenog, imam čast i zadovoljstvo predložiti izdavaču da ovaj materijal štampa i objavi kao samostalnu publikaciju, a stručnoj javnosti preporučiti da se upozna sa njenim sadržajem zbog važnosti problematike koju tretira i rezultata ovog istraživačkog poduhvata.

Sarajevo, 24. 05. 2013. godine

Recenzent:

Obren Bužanin,
sudija Vrhovnog suda Republike Srpske